




Vau tene tene mūno nyamū syonthe sya kīthekanī syekalaa vamwe. Syatūaa na ūtanu mwingī kīthekanī. Kīla nyamū yatethasya wīa wayo vate kūnyungunyīsyā.

Kwaīna līu mwīanu kwa nyamū syonthe. Nyamū syaīna syīndū syonthe ila syendaa. Kītheka nīkyavw'īkīte nyamū nesa. Vai mūmaitha waī avikīa nyamū vala syatūaa. Syatūaa na mūuo. Nzou nīwe waī mūsumbī.



Ngalīko īngī ya kītheka vaī kalūsī. Ngalīko ya ītheo kalūsīnī vaī ndia nini. Kīla mūthenya Nzou nīwatembeaa kīthekanī. Atembeaa kwona ūndū nyamū syatūaa. Nīwendaa kwona ūndū nyamū syatethasya wīa wasyo. Nīsyekalasya kītheka kī kītheu mūno.

Mavinda amwe nzou nīwakuaa nyamū imwe na mūongo wake. Nīwaseūvitye nzīa īla nyamū syesīlaa. Nzou aī mūsumbī mūseo.

Nyamū syonthe nīsyamwendete mūsumbī woo nzou. Nīsyamwinīaa mbathi sya kūmūkumya yīla wavīta:

*Nzou Mūsumbī witū mwendwa,
We nue mūnene mūno,
Nzou mūsumbī witū mwendwa,
We nue mūseo vyū!*



Ngaliko ūngī ya kītheka vaī mūsyī. Waīna nyūmba mbanake mūno yaīna wiio mūseo. Vaīna malīu me kīvathūkanio mavandītwe mūñdanī. Mūsyī ūū waī wa mūndū.

Mūndū atūaa mūsyīnī ūyū na andū ma nyūmba yake. Vaa Mūndū nīwe waī mūtūi eweka wa nyamū ila itūaa kīthekanī. Nyamū mbīngī nīsyamwīsī. Nīsyathekaa ūndū mūndū na andū ma mūsyi wake matembeaa na maaū elī.


Mūndū nake nīweesī nyamū imwe. Nīwoonaa nyamū imwe aumaala mūsyī kwake. Nīwautaa kīw'ū kuma ūsīnī. Nīwakomanaa na nyamū ingī aiketha matunda ma kīthekanī.



Kalūsī kaīna kīw'ū kīthithu. Ūtee wa kalūsī vaī isesi sya nyeki ya vuvī. Nyeki īsu yatūaa yīya ngilinī mavinda onthe. Isesi isu ityanyaa ona yīla kwī sua īvyū mūno. Nyamū mbingī nīsyendete kūthyūmūa isesinī ii.

Nzou na mūsyī wake nīmendete kūthambīa ndianī. Nīmendete kūthaūka na kīw'ū kī ndaka kīsionī kī. Kīla mūthenya nīmathaūkaa kīwūnī kī ndaka kuma kwakya kūvika mawīoo.

Nzou aī mūnyanya wa mūndū. Kī nīkyo kītumi Mūsumbī nzou weetīkīlilye mūndū kūtūa vakuvī na kītheka. Īla Nzou wathi mūsyī kwa mūndū, mūndū nīwamūnengae maiū meu.




Mūthenya ūmwe nzou nīwamūthokeie mūndū. Mūndū nīwatanie mūno. Nīwatanie kūmūthokya mūsumbī nzou. Nīwamunengie kītembe kya maiū meu aye.

“Mmhh! Meania mūyo!” nzou nīwawetie. Yīi yaī ūvinda ya mūsumbī nzou kūya maiū meu. Māwīoo mūndū nīwanengīe nzou maiū angī meu atwaīe syana syake. Mūsūmbī nzou nīwatanie mūno.

Nyamū nīsyaseng’ie mūno kwona nzou aumīte mūsyī kwa mūndū. Vai ūmwe aī atonya kūkūlya nzou ūlū wa nthoki yake kwa mūndū.


Tūsaū twa nzou nītwendeeiw’ē nī maiū meu. Nītwakūlilye ūthe atūmanthīe maiū angī. Nzou ndaīna maiū angī matiele. Maiū mayameaa kīthekanī.



Tūsaū nītwaīie ūtukū wonthe. Inya woo, mūka wa mūsumbī, nīwathīnīkie mūno. Mūthenya ūla waatīe Nzou nīwoonie Ngūlī īvītīte. īvindanī yīu ngūlī ndyekalaa mītīnī ūlū.

“Enda vala ve mūndū ūmwīe aūnenge maiū meu me mūyo ūetee tūsaū twakwa.” Mūsumbī nīwaumisye mwīao. Ngūlī nīyakililye kwa kavinda ūsūanīa. Nīyamūthengjeeie Mūsumbī Nzou.


“Mūndū e maūī mūno. Eūnenge maiū īndī akoosa kītheka kitū,” Ngūlī nīyamūsukīie. Nzou nīwathatie mūno. Avīndūka na mītūkī na amīkūna ngūlī na kūū kwake kwa ītina. Ngūlī nīyekiw’ē ūlū mūtīnī ūla waī vakuvī. Kuma īvindanī yīu ngūlī yambīisa kwīkalaa yīlū mītīnī.



Mūsumbī Nzou nīweetie nguu. Nguu aī mūtūmwa mūkīku.
Īvindanī yīu nguu yaīna kīconde kītendeu ta kya nguū.

“Enda kwa mūndū ūmwīe aūnenge kītembe kya maiū meu me
mūyo.” Mūsumbī nīwaumisye mwīao kūla kwī Nguu. Nguu
nīwakililye kwa kavinda na īndī asya kwa wasya wa kīmako.


“Mūndū e ītomo mūno, eūnenga maiū īndī akoosa kītheka kitū”
nguu nīyasūngīie. Nzou nīwathatvie mūno. Nīwamīkinyangie
nguu na woo mwingī. Nguu nīwakuie īvinda īasa kūvoa. Yīla
wavoie mūongo wake wooma. Nīwakwatie makwaū kūvika
ūmūnthī.



Mūsumbī Nzou nīweetie Ngī. Ngī aī mwīwi kwī nyamū ila ingī syonthe. īvindanī yīu Ngī yaīna ngambu ndūngalu na maeo make matyaumīlīte nza.

“Enda vala ve mūndū ūmwīe aūnenge maiū ma yelo kwoondū wa syana syakwa.” Mūsumbī nīwaumisye mwīao. Ngī nīwakililye kwa kavinda aisūanīa. Nīwaendīe kūtūnī kwa mūsumbī na amūsukīsya.

“Mūndū ti mūkīku. īvindanī ya tene mūno mūndū aīna mūñda mwanake ta ū. Wetawa mūñda wa Eteni. Mūndū nīwaleile kūmwīthukīsya mūnene wake nake alūngw’ā mūñdanī. Yu nūkwenda kwosa kītheka kitū.” Ngī nīyawetie. Nzou nīwathatie mūno. Nīwathyūkisye mūw’ongo wake kwī Ngī. Nīwamīkūnie ngī ngambu na mīthya ya mīw’ongo. Kī nīkyo kyatumie maeo ma ngī mekonza na kuma nza wa kanywa wake.



Yu kwaī mawīyoo. Mūsumbī nīweesililye ūtukū wonthe. Ndaatonya kūkoma. Mūthenya ūla waatīie kīoko nīweetie nzoka nyūmbanī kwa Mūsumbī. Īvindanī yīu nzoka yaī na kīconde kīseo kī mawia.

“Enda vala ve mūndū ūmwīe aūnenge maiū ma yelo kwoondū wa syana syakwa,” Mūsumbī nīwaumisye mwīao. Nzoka nīyatelemile kwīw’ā ūū. Nīyathūie kīconde kyake kī mawia na mūtwe wake. Nzoka nīyamwīsī mūndū nesa vyū. Meethītwe me amaitha kwa īvinda īasa. īndī nīyaisye.

“Nīnekalaa na mūndū. Nīnamūkengie. Ena woo mūno nūndū wakwa. Akangūna mūtwe. Akooka kwosa mīw’ongo yaku. Na akoosa kītheka kitu.” Ūndū ūū nīwamūthatisye nzou. Nīwakinyie mūtwe wa nzoka na kūū kwake Kūnene. Nzoka nīyatatie kwīīthasya. Nīyavinyīīwe nginya wia wayo wauma na yatiwa na kīconde kītendeu kūvika ūmūnthī.



Nyamū syonthe nīsyew'ite kīla Mūsumbī wamīkie ngūlī. Nīsyeesī kana ngūlī yīkalaa mītīnī tīlū. Nīsyoonete ūndū nzou yeekie nguu. Nīsyeesī kana nguu yu yī kīkonde na mūongo mūmū.


Nyamū syonthe nīsyew'ite kīla Mūsumbī wamīkie Ngī. Nīsyeesī kana ngī yī maeo maumīlīte nza. Nīsyoonete kīla nzou yeekīte nzoka. Nīsyeesī kana nzoka yu yī kīkonde kītendeu. Nīsyeesī kana no mūvaka nzoka yumye kīkonde kyake kīla īvinda.

Nyamū syonthe nīsyakomanie kīmbīthīnī. Iyaamūtavya Nzou. Iyendaa Mūsumbī aimanya mīvango yoo. Nīsyatongoewe nī mūnyambū. Nyamū nīsyew'anie kana Mūsumbī eeta ūmwe woo makaendaa onthe.



Mūvango waī kwīivitha ikuthunī nīkana mone kīla Mūsumbī Nzou ūkwīka. Nyamū nīsyeesī Mūsumbī nzou nūkwīta ūmwe woo. Vai nyamū yaaenda kūthi vakuvī na Mūsumbī.


Kīmbu nīwookīlilye ūīme asya, “nīngūthi vakuvī vyū ūndū vatonyeka, nīvithanītye na matū.” Mūsumbī ndeesī mūvango ūla nyamū syaī naw’o.



Mūthenya ūla waatīe Mūsumbī nīweetie mboo. Mboo aī ūmwe wa asikalī aīkīku ma Mūsumbī. Mboo nīwasungaa mbingīlo sya nyūmba ya mūsumbī. Īvindanī yīu mbya sya mboo syailyī ta sya ng'ombe.

Mboo aī mūsikalī wī ūkūmbaū. Nīwaumie mbingīlonī na asema kwīw'a kila mūsumbī wendaa.

Mboo avīka Mūsumbī nīwamūnengie mwīao, “Enda vala ve mūndū ūmwīe aūnenge maiū ma yelo kwoondū wa syana syakwa.” Mboo nīwavindisyē kwa kavinda, aisūanīa.



“Mūsumbī wakwa, kīla ūvinda nīnonaa mūndū atūsyāīsye kuma mwakonī wa mūnyoolo. Nīwendete twīthīwe ngombo syake. Ona ūndū wīkīte ng’ombe. Nīwendete kwosa mbya sya mboo.” Mboo nīwaneenie.


“Nūkwosa kītheka kīla nī ūtūo witū. Akatema mītī akwate malī ya kwaka nyūmba yake. Akatema mītī avīvye makaa. Akatema mītī akwate ngū. Na ūndī akaīma mūñnda wake na aivanda malīu.” Mboo nīwaendeeie na kūneena.

Ndeto ii nīsyamūthatisye Nzou. Nīwamūkimie mboo mūtwe na mīw’ongo yake. Kīi nīkyo kītumi mbya sya Mboo ikonzekete. Mbya sya mboo nī ngonzeku kūvika ūmūnthī. Mboo nīwasembie aenda kīthekanī. Nīwaekie kūsunga Mūsumbī.



Kīmbu nīweew'ie kīla kīndu. Nīweevithīte ītūnī ya mūti īlū wa Nzou. Kīmbu nīwaendie atavya nyamū ila ingī kīla Mūsumbī nzou weekie Mboo. Nyamū syonthe nīsyaukie wīvithonī. Syatongoewe nī mūnyambū. Nīsyainaa:

*Nzou! Nzou! Tūiūkwenda īngī!
Nītūneewie ūndū ūnakūnie ngūlī,
Yu ekala mītīnī īlū.
Nītūneewie ūndū ūneekie nguu,
Yu ena mūongo wī malanga.
Nītūneewie ūndū ūneekie ngīi,
Yu ena maeo maumīlīte nza.
Nītūneewie ūndū ūneekie nzoka,
Yu ena kīkonde kītendeu.
Nayu mwendwa witū mboo! Tūiūkwenda īngī!*



Mūsumbī Nzou nīwatelemilw'e ni kīlonzo kīla weewie kya nyamū. Ndeesī vala kīlonzo kyaumīte. Nīwalilikanile ūndū ngūlī yamwīie. Nīwalilikanile ūndū nguu na ngīi mamwīie. Nīwalilikanile ūndū nzoka yamwīie.

Nīwalilikanile ūndū mboo yamwīie. Nīwasūanīie oona kana mūndū nūtonya kwīthīwa esīite mīw'ongo yake. Mūsumbī Nzou nīwamanyie kana maūndū ti maseo. Nīweetie tūsaū twake twonthe na iny'a woo.

Nīmasembie ūndū matonya. Nīmakwatie wīvitho kīthekanī nthīnī. Na vau nīvo wīkalaa nginya ūmūnthī.



GHRRRR!



Nyamū syonthe nīsyatanie mūno. Ngūlī nīyatanie! Ngūū onayo nīyatanie! Ngīī nayo yatana! Nzoka nayo yatana. Mboo onayo yatana mūno. Nyamū syonthe iyendaa nzou kwīthīwa e Mūsumbī woo īngī.

Nyamū nīsyakomanie īngī. Syamūnyuva Mūnyambū kwīthīwa Mūsumbī woo. Mūnyambū nīwe Mūsumbī wa kīthekanī kūvika ūmūnthī.